

OHMÄCHTIGI BRIEDER

2006

MIIR STEEN UNTER STRO(H)M

Tschu-tschu-tschu-tschu Waggiswaage
Fahre mir putzmunter.
Zem Strom dien mir vyyl Sorgfalt traage,
Im Zug wär das e Wunder.
Gehn zerscht s Comité go griesse.
Das wär schyynt s ganz froh,
So Strohvääge nimm griesse z miesse,
S schetzt Schwachstrom meh Stroh.

Tschu-tschu-tschu-tschu Waggiswaage
Fahre mir durch d Route.
Dr Strom duet bin yys nid versaage
Wie die, wo z Basel schutte.
Gen zem Unggle Gimenez
Dä isch jo nimm drbyy
Dr Müller wägg, bald schuttet jetzt
Dr Muri z St Louis.

Hamatschu-tschu Waggiswaage
Drei Daag lang nie im Koma.
Sin mir mool still, muesch nid verzaage,
Denn hängg ys doch an Strom aa.
Gen scharf rächts zer Saskia
Schnäll go kondoliere.
Ob d Stadt drfiir sell Gliggwisch ha,
Muesch nimm gross studiere.

Hamatschu-tschau Waggiswaage
Fahre mir durch Basel.
Wenn ain kai Pfuus het, nur nid klaage,
Mir saage, dass är draa sell.
Gen zem Unggle Jögge Schild,
Oder lehn mir s blyybe?
Wäg em Grossroot isch är wild
Und mied vom Buesse schryybe.

Tschu-tschu-tschu-tschu Waggiswaage
Kai Strom, denn kasch nid haize.
Wenn mir s dusse nimm vrtraage,
Stäche mir in d Baize.
Gen zem Wyss Kurt in sy Halle.
S Fondue wermt, doch denne
Duet s dr Polizei nimm gfalle,
Drum git s Holzstiehl zem Vrbrenne.

Tschu-tschu-tschu-tschu Waggiswaage
Fahre mir im Winter,
Bsueche au no, sunscht gäbt s Klaage,
Vyyli glaini Kinder.
Gehn zu allne Kinzgi-Tante
Mit ihrne Glaine, Liebe.
Doch derte wirsch jo nimm verstande.
Muesch zerscht no Hochdytsch iebe.

Tschu-tschu-tschu-tschu Waggiswaage
Fahre mir in Syyde
Bsueche dert, wie wänn mir s saage,
Lyt, wo stargg mien lyde.
Gehn zu de Olympia-Frinde
De Schwyzer, s isch zwar wyt.
Doch nämme sy, wenn mir sy finde,
Sich widder vyyl, vyyl Zyt.

Tschu-tschu-tschu-tschu Waggiswaage
Fahre mir durch d Stroose.
Drei Daag Fasnacht uusetraage
Halt, loss dä Stegger in dr D...

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde
und dr Rädäbäng kaufe.
